

# Pastur, catschadur e scribent: «Leo Tuor unescha quella scarsa trinitad»

Leo Tuor (62) ha retschert il venderdis sera il Premi da cultura dil cantun Grischun – a Sumvitg, en sia vischnaunca nativa e da dimora. Il redactor dalla NZZ, Roman Bucheli, ha caracterisau ed undrau en ina fuorma analitica l'ovra dil scribent dalla Val Sumvitg.

HANS HUONDER/FMR

«Ils davos meins havein nus sentiu en ina moda impressiunonta che la cultura viva dil brat direct e persunal – seigi denter artists sezs sco era en lur interaziun cul publicum.» Cun quels plaids ha cusseglier guvernativ *Jon Domenic Parolini* aviert il venderdis sera la surdada dil Premi da cultura dil Grischun 2021 en casa da scola a Sumvitg.

## Sumvitg – in bien terren per scribents

La riezia culturala e linguistica dil Grischun seigi da vegl ennu unica e fetg varionta e vivi extraordinariamein: «Ordvart remarcabel eis ei che quella diversitad e vitalitad resulta la finla dalla summa da tontas acturas e tonts acturs e loghens d'acziun gronds e pigns. Quei selai mussar a moda exemplarica vid la riezia impressiunonta dall'ierta culturala e natirala dalla vischnaunca da Sumvitg.» El numna la Greina sco monument natiral, la caplutta a S. Benedetg sco ovra architectonica da *Peter Zumthor* ni ils scribents *Alfons Tuor*, *Gion Deplazes*, *Theo Candinas* e *Leo Tuor*. Il vicepresidente communal *Robert Candinas* che ha representau il president communal *Armin Candinas* ha gratulau a Leo Tuor: «Ei legra la vischnaunca ch'in conburgheis survegn quei premi.» Sper il premi da cultura ha il minister da cultura *Jon Domenic Parolini* era saviu surdar il venderdis sera sis premis da reconuschientscha e tschun premis da promoziun. Tut en tut ein 250 000 francs vegni reparti per prestaziuns culturalas extraordinarias. Il president dalla cumissiuon da cultura dil cantun Grischun, *Köbi Gantenbein*, ha tenui las laudatios pils endisch retscheviders da premis da reconuschientscha e promoziun.

## Premis pli che merita

«Onna Maria Tumera», «Giacumbert Nau», «Settembrini», «Cavrein» ni las numerusas columnas che Leo Tuor ha scret fascineschan entras lur lungatg, las constatziuns incunparegliablas, mo era entras siu sentiment pils animals. En sia laudatio il venderdis sera a Sumvitg ei il schurnalist *Roman Bucheli* ius sil funs dalle ovras dil pastur, catschadur e scribent che habitescha cun sia famiglia en Val. En in'analisa dall'ovra da Leo Tuor che ha cuzzau pressapauc 12 minutas eis el sefatschentaus d'entginas cuntradiziuns dil cuntegn e digl agir digl autur. «In catschadur duess mai scriver. Gnanc vegnir sill'idea da scriver», citescha Bucheli igl aug «Settembrini». E tuttina hagi Leo Tuor fatg quei – pia scret era sco catschadur. Mo lu in detagl ord il cudisch «Cavrein»: «Culla catscha eis ei sco culla veta. In bi di ei tut vargau, dasperas ha ei pér gest entschiet.» Quei tuni bein, mo seigi medemamein falliu. «Aunc mai ha la regenza surdau il premi da cultura per tonta paschugna. Mo aunc mai havein nus saviu esser aschi engrazievels ad ella. Darar ha in scret tontas construcziuns che paran



Il cumponist e dirigent *Curò Mani* ha survegniu in dils sis premis da reconuschientscha dil cantun.



In mument da legria per Leo Tuor, mo era per cusseglier guvernativ *Jon Domenic Parolini*.



*Andriu Deplazes* ei in dils tschun purtaders d'in premi da promoziun.

FOTOS HANS HUONDER



*Roman Bucheli* ha tenui la laudatio per Leo Tuor.

fallidas, mo che tucan en ina moda misteriusa il coc dall'ovra litterara ed il medem mument las damondas essenzialas dall'existenza», puntuescha Bucheli e di: «Per l'ovra da Leo Tuor desistel jeu da bia dalla litteratura mundiala.»

## Exotic ed excentric

«Nus duessen buca emblidar che Leo Tuor unescha il scribent, catschadur e pastur – pia quella scarsa trinitad. Pli exotic ed excentric san ins buca imaginar quei. Ed ins manegia ch'enza tgei hagi da far nuot cun tschei, la catscha nuot culla litteratura ed il pastur aunc bia pli pauc cul scribent. E tuttina ein els enzaco parents dall'olma: Il pastur, il catschadur ed il scribent», constatescha *Roman Bucheli*. Catschadurs e pasturs sappien dapli ch'ils auters dil vegnir ed ir dalla creatira. La risposta silla damonda daco che Leo Tuor sefatschenti en sis ovras dalla veta e dalla mort seigi semplu mo tuttina greva. *Roman Bucheli* citescha ord il cudisch «Giacumbert Nau»: «El haveva pli bugen ils animals che la gliued.» Ni: «Sch'jeu vegness aunc ina ga sil mund less jeu esser in tgaun.» Quei ei exempels che muossan tgei sentiment ch'il pastur ha per ses animals. Leo Tuor lai reviver quei en sias ovras. Per conclu-

sion constatescha *Roman Bucheli*: «Leo Tuor havess merita quei premi era sch'el havess scret bia pli pauc. Nus essan engrazievels ad el per mintga cudisch e mintga plaid. Tuts muncassen sch'in sulet muncass.»

## Il poet – il cavacristallas

«La lavur dil poet ei, sch'jeu vesel endretg quei, empau sco quella dil cavacristallas. El emprova da dar en in fuorn, d'arver quel e spera ch'ei vegni viadora zatgei. Arver fuorns ei aber era cumbinai cun far empaglia. Quei cul far empaglia ei era cul scriver aschia. Quei sco igl ei, disfan ins cun metter sin pupi. Quei ei il prezi ch'ins paga da prender naven il vuler scuvierer. Il far poesia ei il cunst da mo stuschar dalla vart in tec igl uham per buca fugentar il misteri. Perquei ei nuot clar ella poesia. Era nuot falliu. Far poesia ei tucchar il dretg tun e destadar.» Cun quella constatziun ha Leo Tuor entschiet il venderdis siu plaid d'engraziament pil premi. Ei seigi in di sco ina dumengia e las dumengias contien ils utschals auter ch'ils luvendis. Ins sappi denton buca daco che quei seigi aschia. Mo era lu contien els sco il bec seigi carschius – mo tuttina auter. «Jeu gaudel ch'ins sa buca declarar quei. Da guder ston ins imprendder», di Leo Tuor. Pia: Era en siu plaid d'engraziament ei Leo Tuor staus fidevels a sia relaziun culla natira – culs animals.

## Premis da reconuschientscha

Mara Capelli, 1967, saltunza, Roveredo; Ralph Feiner, 1961, fotograf, Malans; Vera Kappeler, 1974, musicista e Peter Conradin Zumthor, musicist, 1979, Haldenstein; Curò Mani, 1949, musicist, Ardez; Jürg Schmid, 1957, perscrutader d'insects, Glion; Uniun e fundaziun Valendau Impuls, 2004, Valendau.

## Premis da promoziun

Chiara Balsarini, 1985, rescissura ed actura, Brusio; Andriu Deplazes, 1993, artist, Sagogn, Brüssel e Marsiglia; Sara-Bigna Janett, 1990, musicista, Tschlin/Turigt; Val Minnig, 1991, artista, Cuir/Turigt; Gian Stecher, 1983, musicist, Domat.

## CADI

### Fabian Collenberg duei suandar a Gabriela Tomaschett el Cussegl grond

La PCD Cadi senumna da niev Allianz dil Center Cadi. Quella decisiun ha la partida priu il venderdis vargau. La medema sera ha ella nominau ils candidats pil Cussegl grond. Per Gabriela Tomaschett-Berther che seretila sco deputada duei *Fabian Collenberg* suandar.

Spel niev *Fabian Collenberg* nominescha l'Allianza dil Center Cadi ils treis deputai en uffeci *René Epp* (Mustér), *Clemens Berther* (Mustér) e *Diego Deplazes* (Sumvitg). Pil circuit da Breil vegn *Maurus Tomaschett* (Breil) nominaus per in'ulteriura perioda d'uffeci. *Gabriela Tomaschett-Berther* (Trun) che seretila ha apparteniu 12 onns al parlament cantunal. Il niev proponiu *Fabian Collenberg* ei co-president dalla giuvna Allianz dil Center Grischun ed il mument emprem suppleant dalla Cadi. *Fabian Collenberg* ha 29 onns ed ei canzlist communal da Sumvitg. El s'engascha gia dapi biars onns ella politica, seigi quei sin plaun regional ni cantunal. Plinavon s'engascha el era fetg pil svilup local, aschia ei *Fabian Collenberg* era ella suprastanza dall'Uniun Lag Salischnas.

Pils suppleants da deputai dat ei negina elecziun publica pli, scadina gliesta electorala sto denton cuntener tschun candidatas e candidats pussevels. Proponi per quella funcziun pil cumin dalla Cadi vegnan *Flurina Bundi Steiner* (Trun), *Reto Schmid* (Tujetsch) ed *Armin Manetsch* (Mustér). La cumpetenza per occupar ils dus plazs restonts sco era il plaz liber per Breil vegn surchada alla suprastanza.

## Radunonza generala a Breil

L'Allianza dil Center Cadi ei seradunada el Resort Pradas a Breil. *Beat Zenklusen*, il director dil resort Pradas e *Gérard Carigiet*, commember dalla direcziun, han referiu davart lur menaschi, avon ch'ils commembers han saviu prender investa dil resort. Ultra dalle nominaziuns ha la partida reeligiun sia suprastanza consistenta da *René Epp* (president), *Maurus Tomaschett* (vicepresident), *Fabian Collenberg* (actuar), *Donat Albin* (cassier) ed ils assessurs *Gabriela Tomaschett-Berther*, *Placi Berther* e *Victor Flepp*. Cun occasiuon da quella radunonza historica cun midada dil num ha la partida saviu far in beinvegni al copresident dall'AdC Grischun *Kevin Brunold*, ils cussegliers guvernativs *Marcus Caduff* e *Jon Domenic Parolini* sco era alla candidata per la regenza *Carmelia Maissen* ed il cusseglier nazional *Martin Candinas*. (cdm/fmr)



Da seniester *Fabian Collenberg*, *Maurus Tomaschett*, *René Epp*, *Jon Domenic Parolini*, *Carmelia Maissen*, *Marcus Caduff*, *Diego Deplazes*, *Martin Candinas*, *Clemens Berther* e *Kevin Brunold*. FOTO MAD

## MUSTÉR

### Las pendicularas han adattau il project per la casa da parcar

La vischnaunca da Mustér ha publicau la damonda da baghegiar per la casa da parcar dalle pendicularas. Quella duei vegnir baghegiada spel Resort Catrina visavi la staziun da val dalle pendicularas. La casa da parcar consista da treis alzadas senza tetg. Plinavon duess ei dar ina passarella per pedunzs entochen alla staziun da val. La casa da parcar ha rodund 450 parcadis e cuosta 6,5 milliuns francs. Igl ei previu da far l'emprema badelada ils 14 da mars 2022. Sco il director dalle Pendicularas Mustér SA, *Stefan Arnold* di, pudess silmeins ina dalle treis alzadas esser finida silla stagiun d'unviern.

Ils emprems plans per ina casa da parcar ha ei dau il 2018 e l'emprema damonda da baghegiar era vegnida inoltrada alla vischnaunca avon dus onns. Ei ha lu dau protestas encunter il project e la fin finala ha era *Marcus Weber*, igl acziunari principal e president dil cussegl d'administraziun dalle pendicularas, frenau il project damai ch'el era buca cuntents culla suprastanza communal. Sco quei che *Stefan Arnold* di, han las pendicularas midau il project. Ussa seigi el adattaus alla cuntrada ed ei detti negin tetg. La collaboraziun cullas autoritads communalas seigi puspei buna. (rtf/fmr)